

Männerturnverein Wislig Chlausobig 2011

Begrüssung.

Jedes Johr, als allerletschte Geüss,
erwartet Ihr eus Samichläus
Ihr hocket do wie d'Goofe i dä Stube
sind ganz still ihr düend nüme Juble.
Dä eint oder andre isch jetzt scho ganz bleich
„Weiss ächt dä Chlaus, dass i gmacht han en Seich?“
Doch leider, was mir ghört händ isch mageri Choscht
jo früener, do hani Büecher voll gschriben, jo du Proscht.
Ich frog mich, sind euri grosse Vögel langsam und bequem?
Oder sie findet euers Beneh zum Brichte nöd so Agnehm!
Mir schicketes jetzt dänn zu eu ist Sommer-Training
vielleicht liet dänn ein Flug meh noch Sterneberg drin.
Drum all die wo mer hüt nöd tüend i dPfanne haue
müend dänn nöd plöffe dihei bi Ihrne Fraue,
mer wüssed scho, en jede hät Dreck am Stecke,
nur die einte chönnts halt besser verstecke!

E Neuigkeit, das werdet ihr bald ghöre
doch lönd eu vo dene Ischaltige nöd störe,
dänn mir müend halt au luege zu euserm Geld,
wänn alli nume no spared i däre Welt.
Au euren Kassier isch taub uf beidne Ohre,
mit mim Aatrag uf Gage erhöhig han ich verlore.

WERBUNG 1

Wenns vorne juckt und hinten beisst,
nimm Chlosterfrau Meliisegeischt!

Skiweekend

Es schneielet nöd , es beielet nöd und es goht kein chalte Wind,
uf dä Pischte hät's viel Pulverschnee und d'Sunne schiint an Grind.
D Mittagspause tuet alli erfreue, sie lieget, und händ d'Auge zue
nur zwei vo dene Pischtesäue, dänne lots halt kei Rueh.
Sie chönnds nöd gnüsse und schlichet luutlos dervo,
gsehsches mit Schie, Stöck uf dä Sessellift goh.
Zoberst ufem Gipfel so ganz i dä Natur
vo wiitere Schiifahrer wit und breit kei Spuur.
Beidi Karvet, düend alles rundum vergesse,
eis Kürveli noch em andere, ganz versesse.
Es stüübt und zischt, en Klapf und Rueh
Dänn flüged wäg, d Stöck, dSchii und d Schueh.
Vorbii isch jetzt mit em Grind verbrenne,
d'Kamerade düend uf d Pischte renne.
Oh Schreck, en Jammer mer chas fascht nöd gseh
wie die zwei lieged verchrümmt im Schnee.
Zum Glück häts unter dä Sonneabetter
au ä Ärztin, die schnallt a sofort d Bretter.
Doch was sie gseht, isch gar nöd vom feine
d Hans Rieser schoht uf und muess zerscht mal geine
ich bin no ganz, mir tuet nüt weh,
und chlopft sich ab dä wiisi Schnee.
Doch dä Peter Forscher isch nöd zbeniide
Er hebt sich d Schultere, muess fürchterlich liide
Er schmerzstillendi Schprütze tuet d Ärsin im geh
I dä Luft chann mer scho dä Rettigshelikopter gseh.
Uf dä Pischte hätts en huufe Lüt wo tüend gaffe
und wönd ali gseh, wien mer dä Peter tuet usschaffe

WERBUNG 2

Wotsch Pischt mit Schnee wo dir nöd tüend verleide
dänn mach doch Ferie i dä Lenzerheide!

Los Albin häsch für s nächscht Schiiweekend scho umdänkt,
dänn dä Patrick, d Peter und Hans händ d Schultere scho usgränkt!
Ich gibt dir en uete Root, has au em Schmutzli scho dörfe verzelle,
gang doch mit dinere Gruppe eifach go bade und welle!

WERBUNG 3

Wotsch Rueh, Erholig und bruni Eier.
dänn mach doch Ferie am Brauiweiher!

Turnfest

Wie jedes Johr ziehnd sie vo danne,
kräftig bauti, gschtandni Manne
D'Wädli gschmiert mit Wundersalbi,
die mache ganzi Sache und kei halbi
As Turnfäscht reiset und sind siegesgewiss,
sie händ guet trainiert und drum sehr viel Biss.

Vier Manne mit Sprinnterwädli wie Büch vomne Elefant
Schtönd am Start und sind ganz gschpannt.
Sie muschtered d Gegner, die müend mir doch schloh
dä erschti Sprinter tuet scho im Startloch schtoh.
Dänn gits en Knall, er rännt los es mues em lange
chehrt um grad vor dä Begränzigsstange.
Am Ziel klatscht er ab, dä nächshti tuet seckle,
au dä git alles, obwohl er fascht muess verrecke.
Bis a d Schtange, dänn tuet er schnell wende
und klatscht am nächschte Sprinter i dHände.
Bim dritte, jo do muess mer stuune,
bi dä Wisliger Sprinter do schtiegt die gueti Luune.
En riese Vorschprung händs usegeolt z'Viert
doch noch em Renne werdet's disqualifiziert.
Los Patrick wännnd wieder tuesch die Gruppe trainiere
machs inne vor uf allne viere,
doch muesch dänn luege, das nöd tüend penne.
so gsehns, das mer halt um dä Pfoschte hetti sölle renne.

WERBUNG 4

Chasch vor luuter Usländer kei Schwiizer meh gseh,
dänn wähl doch einfach SVP!

Noch dem Tüfschlag, es isch doch klar
schtönd, bi dänne wo no händ, uf die Haar
Mit gsenktem Chopf und lärem Tank
sitzets bi dä Kollege uf äm Feschbank.
„He, lönd doch dä Chopf nöd lo hange“
und tuet schnell under dä Feschbank lange.
E'Chischte Bier knallt er uf dä Tisch
„Au das isch guet, so chüel und frisch!“
Sie griffet zue und tünt sich luut zue proschte,
vergesse isch das Malör mit däm cheibe Pfoschte.
D Fläsche as Mul und en Grosse Schluck.
Ei händ die das Bier wieder usegschpuckt.
„Nei das chasch nöd mache, da schlon ich Alarm
das Gsöff isch nöd chalt, sondern lauwarm“.

WERBUNG 5

Wotsch feins Fleisch und gueti Würscht im Teller
so chaufs doch einfach bim Metzger Cheller!

Sie tüend sich sammle und nomol berote,
jetz müend mer zämehebe, es söll damol groote.
Dä erschi nimmt d'Chugle und leit sie an Hals
er goht hineabe und schmeisst, er git als.
Die Chugle flüegt und wot nümme landä,,
über d Abgrenzigspfoschte fasch bis zur Bandä.
Dä zweit schüsst sini Chugle is Ziel,
mehr gschpürt, dass au dä gwünne will.
Dä dritti und vierti schtöh nöd hinenah
au sie werfet sie über Pföschte, mer chas ja verschtah.
Mit grossem Vorsprung händ s die Disziplin gwunne,
au mir händ Freud und möged eu das gunne.

Dä Kilometerlauf mer isch au da Present
Es lauft mit, dä Kassier und dä Präsident
Vo dä Siite düend sich beidi begaffe,
wer hät ächt die besseri, schnelleri Waffe?
Bi achthundert Meter, es isch s dänn entschide,
dä Kassier isch wiit hinderm Präsi bliibe.
Los Seckelmeischer musch jetzt nöd täuble,
dä Präsi hät so scho gfange mäenge Räuber
Ich weiss, du bisch en tüchtige Kassier und chasch es nöd lasse
aber renn doch s'nöchschi mol ohni d Vereinskasse.

WERBUNG 6

En Umbau, e neu Chuch oder Fenster,
dänn gang zum Schriener Denzler !

Turnfahrt

Am Morge früh, hebsch dä Schtei vorusse,
Söll ich ufstoh oder nomol go pfuse?
„Du Weichei“, rüeft dFrau und deckt sich nomol zue,
gohn jetz uf dReis, so han ich das Wuuchened Rueh!
Murrend packt er sin Rucksack und tuet abmarschiere,
er hät glärnt folge und tuet nöd no schtalliere.
Won er im Busshüsli ufs Bänkli sitzt,
do gits en luute Knall und en riesige Blitz.
Er hofft es gäb no ä Wetterwändi,
un scho lüüetet im Rucksack sis Händi.
Gschpannt luegt er, das isch jo mini Frau,
was sölle jetzt das, was wott die au.
„Was dä Blitz hät igschlage, du heilige Siech!“
„In Schtromverteiler, aber du häsch no Liecht?“
„Nei nei, du häsch mi gschickt, obwohl sisch cho go Güüse,
tuen jetz du dies Wochenend ohni mich gnüsse!“

WERBUNG 7

Wotsch ab id Ferni oder in Süde,
so gang doch mit dä Swiss go Flüüge!

Turnbetrieb

Im Summer, wänn ich tuen i d'Halle luege,
am Mittwoch am Ahti, tuet alles noo ruebe.
Kei Bei chunnt über d'Schwelle, doch do chömmed doch zwei
so allmählich vier, sechs aber dänn isch s vorbei.
Es langed chum für zwei Volley Mannschafte.
Em Präsi macht dä Zueschtand z schaffe.
Er hät ä Idee, wie er dManne chann id Halle locke.
Ich angaschiert es hübsches Meitli, mit blonde Locke.
Und tatsächlich, sin Plan hätt richtig ischlage
dänn vo dä d Chrabelgruppe freuet sich einigi scho sit Tage.
En warme schöne Summerobig isch es gsih
D Halle bummsvolle, si isch scho fascht z chlie.
Ei, wie sich doch en jede tuet zämme riisse,
die wo nümme möged, tüend sogar Bschiise.
Die jungi Dame mit Charm, Elan und Schwung,
bringt die Manne ganz schön uf dä Hund.
Aber s nöchstimol die gliichi tristesse,
di Junge lönd sich eifach nöd gärn Stresse.

WERBUNG 8

Bisch schlapp und müed und so alein
dänn gang doch in Männerturnverein!

Wänn mer zueluegt i dä Chrabelgruppe,
do tuend sich einigi als überforderet entpuppe.
Die Junge schlönt ihne d'Balle um d Ohre,
jo, er sind hald i Gottsname viel früener gebohre.
Doch Eure Geischt dä chas nöd i geschtöh
dass mer au chönnti zu dä Seniore goh!

WERBUNG 9

Wännt nümme noh magsch, dä Ball flücht dir um dOhre
so gang doch got turne zu dä Seniore!

Die händ im Turne immer Vollbestand und tüend nöd Pfuuse,
do chömmets vo Seuzach und sogar vo Schaffhuuse.
Doch ich glaub die händ es Gheimrezept, ich tuens eu jetz veraate:
Die tüend noch jedem Turnobig en Geburtstag verbrate.
Es sind öppe vierzeh Turner, mit und ohni Hoor,
bi dänne hät jede dreimol Geburtstag im Johr.
Aber was tuets mich das gross interessiert?
Wichtig isch, mer tuet eu öppis Gluschtigs serviere.

Die alti Ühle mit grosse Ohre,
die isch zueschtändig für d Seniore.
Sit em Herbscht, do wott sie meh Looh
Es seigi en neue jüngere Turner derzue choo.
Früener do hann ich chönne am Zähni is Netsch,
doch dä bschtellt no e Rundi und es isch nöd di Letscht.
Au find er immer no so paar alte Galööri,
wo au no mitmacht, nei das stöört mi.
Bis am halbi Eis, tünts hocke bliibe,
wänns heilaufet seichets no a d Schitterbiige.
Los Chlaus entweder tuesch die in Senkel stelle
oder du chasch nümme mit mine Dienschte zelle.

WERBUNG 10

Häsch zvil gsoffe und en tumme Schtei,
dänn lohn dich verwöhne vo dä Frau diehei!

MT Verbandsjubiläum

Im Zürcher Tösstal, do händs e Versammlig von Turnerverband,
si planned vorus, die Manne händ halt Verstand.
Es grosses Jubiläum schoht im 13zäni vor dä Tür.
Zwei Verein tüend sich für d Organisation bewerbe defür.
Effretike wott dä grossi Alass um's Verecke,
Sie chöndet dänn drin au ihres Jubiläum no verstecke.
D Bewerber gönd as Rednerpult,
euse Präsi wartet, dä hät halt Geduld.
Dä Effretiker ret wien es laus Süppli,
„mir möchtet dä Alass und machets wie übpli“.
En verhaltene Applaus mer tuet nöd mitliide,
euse Präsi, dä Willi tuet sich scho dHänd Riibe.
Dänn schoht er as Pult und leuget i die Runde,
er redet wien en Politiker i dä beschte Stunde.
Leits sich is Züüg, tuet vom MTV Wislig nur s Beschti präsentiere,
au neigt er fascht zum übertriibe, aber das tuet en nöd schiniere.
En tosende Applaus, die händ mir im Sack
so hät eusen Präsi das Jubiläum für eu packt.
Aber Willi ich hoffe nöd es gäbi es böses verwache
und du muesch dä Alass ganz eileini mache.

WERBUNG 11

Häsch en Alass tue nö verzage
chasch ruehig eusen Präsi frage!

So liebi Manne göhnd nöd z schpot hei,
bi eu warte e liebi Frau, bi eus numme s Heu.
Gnüsseds no chli die schöne Schtunde
und vielleicht lueged mir s nöchshti Joh wieder i d Runde!

WERBUNG 12

Häsch d'Frau nöd im Griff, d'Chind machet dir dä Garaus
do bschtell doch eifach dä Samichlaus!
